



張處士就菴公傳



張文鑛字以純自號就菴先世爲休寧之孫田人
明末其父叔宜公遷嘉興沈蕩鎮自嘉興來虞山
遂家焉時以純方十歲赴童子試以冒籍攻去後
欲歸試于鄉以千里往返難之年十三作詩有警
句覲菴見而竒之遂與訂交同時有錢梅仙陳滄
漁胡原上劉予弱相倡酬而與覲菴居最近情好
尤密遂專心致力于詩其爲人也甘于澹泊不慕
富貴讀書萬卷篤志勵行動準古人與人譚古今

事如指諸掌書法宗趙松雪最喜白雪齋諸帖年
雖老猶臨池不倦自少至壯居恒稍稱豐裕其儉
朴性成不逾布衣素食惟日坐小齋手一編吟咏
不輟而已孟兄與諸弟則不然或豪邁不羈或揮
金如土處士曾未發一言阻之兄弟間始終怡怡
如也常言家道興衰由命豈人力可爲哉後益復
索寞處之坦如云俾明晨無炊余亦不介懷惟道
之不明品之不立爲可憂耳嘗棄業得金欲爲他
事計者或遇親友通緩急遂傾囊與之已事並不

計也汪簡菴宰新都致仕歸有幼子最愛即修撰
公東山也慕處士之端方每令東山與之遊其觀
摩益有得也性愛山水尤樂與貧士交客于吳興
者二十餘年甲午秋方歸家居僅兩月十月終于
家年六十有七平生所著詩文每不留稿後多散
失其子道淙檢遺篋中惟亦有集若干卷付梓傳
于世余與處士之姪庭仙交最久因悉其爲人且
得讀其詩劉後村詩云真妍非粉黛至巧謝雕鐫
處士之詩如是也後之人自有論定者年家眷弟

王材任頓首拜撰

序

昔人之爲詩也貴有言外之意不盡之思而惟靜者爲能得之蓋詩之爲道所以攄發性情描摹景物非可剽掇塗澤爲譁世悅目具也今人不然往往矜氣馭之躁心出之心之不靜詩於何有是故爲詩者多爲詩而工者絕少行卷方投不必展卷而已可知其所爲詩者矣張子以純承壯武家聲少即擅藻於黌序顧數爲有司所厄輒肆力於古以昌其詩生長清華無綺紈裘屐之習亦不屑屑

於游光揚聲藉詩文爲釣餌是以其心常靜而發
爲長篇短律者皆其情之所不容已盈帙累幅饒
有建安大曆之風讀張子詩者亦遂欲於唐人韋
白閒爲張子設一座也顧張子不第以詩鳴而已
兼工小令長調新聲雅奏古調今翻憑弔則王半
山也寫景則周清真也言情則柳屯田秦淮海也
夫詩盛於唐詞極於宋千古以來已久膾炙今張
子以一人而具此二美能勿令後人突過前人耶
抑又聞之張子曰予祖從新安來喬寓琴川久矣

其間山水名勝江濤月色供我吟助實夥然則張
子之能詩而並工詞賦者其亦秀之所鐘而江山
之佐爲使然歟今 國家文詞取士并重聲律出
張子之才實足以鼓吹休明黼黻文治張子盍勉
乎致身於玉堂金馬閒俾世之人士知我朝有昌
黎工部之筆而總香奩粉碗之長可乎雖然張子
隱矣張子之心靜矣存其所作俟之其人云爾若
謂張子沾沾欲以詩詞名於世夫豈知張子者昔
康熙歲次庚辰春正月東江唐孫華題

序

人之有真性情者必不汨没于名利之場而往往
拔竒於塵俗之外清和張子以純少以英敏之姿
蜚聲諸生間逞其才取科第可以如拾芥家世新
安擁多貲走吳會守其成業又足以自豪乃張子
不屑以書生敝帚之事終其身而亦不樂以紈袴
驕抗之習炫于里巷獨肆其力以從事于詩詩之
工幾及古人予讀其集未嘗不歎張子之性情獨
真也今夫人之日營營焉濡首于中而不出者必

亦存集序
三
其有所爲而爲之者也其所爲者非名則利耳自
世以帖括取士驅天下之聰明才辨敝精勞神於
祿位之途而風雅一道輒棄置不講即或勉強耐
應亦復粗淺可笑蓋天機之窒喪也久矣張子獨
遺棄一切苦志琢磨以底于成非其性好之而情
屬之者胡能若是乎是故當其境有所觸物有所
感揮毫落紙不過自寫其心思非有意于求工也
而人之見之者則已驚猶鬼神不可方物則亦惟
其真者有以動人于不容已也而張子之詩于是

乎至矣夫古詩三百雖野夫婦人之言亦垂不朽
焉性之至情之盡也世之讀張子詩者有以因其
詩而識其性情之真則其於詩也亦思過半矣時
康熙庚辰孟春婁東年家眷弟黃與堅頓首拜撰

亦有集目錄

卷上

來鶴詩二首

秋夜述懷呈覲菴陸先生二十四韻

春日登辛峰眺望次韻

贈潘山人

題扇

送舅氏吳聖允歸新安

和劉子弱初夏漫咏

胡原上有震鄰之恐往奔顧山兩月復歸連

床話舊

題程豈一別業

題桃源圖

來鶴堂賞菊

蠟梅步令儀吳夫子韻

春遊

次韻送胡原上浙遊六首

次韻壽令儀吳夫子五十

和雨窗看奕

茉莉花次顧雪坡韻

初秋夜集次青門韻

蠟梅次陳子京韻

新秋雨過次韻

咏羽扇次韻

送吳簡臣歸新安

送劉跨千赴金陵幕次韻

紅梅四首

八月十五夜寓楓江

虞山友人過訪楓江寓舍有作見贈即次元韻

隨令儀吳夫子遊虎丘次韻

覲菴先生再訪楓江寓齋有作見贈次韻

晚春集季文起齋中次韻

新葺書齋次韻

正月十七日招友人集來鶴堂限韻

楓江旅次送吳儀吉歸新安

暮春至賁湖寓從兄汝藩齋中有感

寓郁子彪留耕樓閒望

庚申花朝同陸覲菴先生錢梅仙榮玉裁集

三省軒觀梅限韻

同覲菴先生過湛弘禪齋適薔薇盛開留飲次韻

次姚玉衡見詒原韻

送程聖符之皖城

拜子游墓

楓江早發

楊邨晚泊

楓江寓舍留別吳子育

程惟達從皖城來虞山話舊

再赴嘉禾作

送汪簡菴之任新都

重過姚玉衡齋中留宿

贈姚白菴

途次有感

癸亥人日集庭仙齋懷伯兄以韜五弟以南

次覲菴先生韻

次和陳在之先生癸亥落花詩八首

和孫麗明竹深處十二咏

風前

月下

雨餘

雪霽

花欄

烟隴

新晴

宿露

池上

巖阿

書窗

吟社

亦有集目錄卷上

亦有集目錄

卷下

寄萊州陳使君

次和周以寧秋日襟感八首

遊支硎山

震澤寓舍書懷

病中有感

秋夜同雲文弟話舊

移居二首

江陰渡江

任家港渡江

送吳潤之之平湖兼為仲兄仲暉壽

題友人小像

西湖飲席有贈

陳滄漁齋中春晚話舊次和見詒韻

挽覲菴先生二首次陳滄漁韻

程欽文書來却寄

納涼次和吳景紳韻

懷程欽文

題畫

春暮書事

秋夕書感

籠中二鳥次和程坦菴韻

咏龍燈次程坦菴韻

寄內

謝漢三齋中玩菊

送人歸魏塘

除夕前一日送婁東友人之吳門
以寧見示秋柳詩即次來韻

題畫

過停雲菴贈中暉上人次壁間韻

七月歸虞書示內子

次日早發留別內子

吳楚白過訪話舊

吳江道中

送人歸黎川

金閶夜泊

中秋前三日吳紫瞻止宿齋中次韻

重陽後十日婁東友人過訪

申山道中望峴山有作

八月十三夜舟泊虎丘

花岡道中

和三峯碩揆和尚冬月桃花十首

三峯夏月梅花詩十首和湘靈錢先生韻

和高太史詞八首

牧羊詞

種魚詞

紡紗詞

放鷹詞

伐石詞

播穀詞

采菱詞

賣菜詞

次和馬栖霞移梅韻四首

次和龔雪航移居五首

同以寧夜話偶成二絕

聞露滑歸自鄧尉賦梅花詞四首寄之

金閭旅次同雲文弟夜話

春暮次汪子宜韻

癸巳閏五月哭大兒道澍

亦有集目錄卷下

亦有集卷之上

○來鶴詩二首

有序

孫田 張文鑛 以純

常熟縣治之南有橋曰望仙稍西有橋曰文星
其中有宅一區順治戊戌予父叔宜公由武源
移家僑寓焉康熙癸卯予父沒三弟以信次年
亦逝予與伯兄以韜季弟以襄五弟以南同居
宅中奉遺命也其堂南向堂後有樓樓之東西
兩偏皆有小庭樓之中庭花木竹石雜置紛布

雖無山林之雅絕少塵市之喧乙巳九月十二日天高氣清窗几晃朗日猶未午予坐樓之西偏忽覺雲光飛隨風聲驟來恍若欲雨將暮之狀按頭書卷亦颼颼然而中庭則有聲聲若九臯之音予以爲訝趨而視之見有丹頂雙翎軒然而立者則鶴也夫鶴係仙禽非碧海不栖非丹山不止又胡爲乎來也適童子來告堂上有客至予出而揖焉客曰我來移時矣夫何有夏然之聲聞于外也其醜而受之者耶其買而得

之者耶吾差以爲怪也予述其故客曰此休徵也非鶴之來乃天降之瑞寔有所以來之也遂作來鶴詩示予夫不曰鶴來而曰來鶴客之意彌深且遠矣一時士友咸來觀焉詩賦哥詞雜相投贈予因作二首以相酬云

丹砂爲頂雪爲衣雙翅踰躑下翠微華表歸來和月語芝田戲罷帶雲飛不隨金閣青鸞舞暫與瑤池紫鳳違馴擾豈須重鍛羽悠然贏得共忘機池館蕭閒竹樹疎摧藏何事戀吾廬啖時不覺風

聲迴舞處還憐雪影虛敢以仙禽徵瑞應漫邀詞
客贈瓊琚乘軒未卜他年事且向幽窗伴讀書

秋夜述懷呈覲菴陸先生二十四韻

顥氣滿林垆披襟向晚亭窗虛秋寂寂樹合霧溟
溟燭影風搖幌砧聲月過櫺疎桐依敗井寒草掩
荒庭暗繞驚枝鵲稀流怯露螢神交仍不寐心醉
却難醒身世渾無賴年華不暫停張衡愁渺渺潘
岳鬢星星汗漫鵬搏翼迤邐鶴鍛翎歌休翻白雪
梯已隔青冥粘比泥邊絮漂同浪裏萍雖云拚玉

折敢不羨蘭馨閉戶希楊子鋤園類管寧琴中詎
識趣座右祇鐫銘文藻思開苑圖書擬列屏芸籤
標甲乙緗帙炳丹青譌謬讐三豕空疎昧一丁彌
年趣絳帳繫日叩玄扃窺豹那容管撞鐘可待蓬
清言惟析理雅飲每忘形感激徒心切沈吟但涕
零波濤驚浩瀚珠玉駭晶熒祇自調宮羽憑誰辨
渭涇端居榮慕絕皓首亦窮經

○春日登辛峯眺望次韻

晴巒閒極目景物一番新紅見桃翻浪青知草展

茵金衣尋谷口玉勒出城闈擬讀五千字摩抄不
覺頻

○贈潘山人

小窗幽興與誰論疎嬾常期老華門半榻涼風堪
拂塵一庭新月可飛樽隴頭每待銜書鶴厨下時
來舉火猿却喜蕭然無俗慮不勞鼓棹向桃源

題扇

雲樹護溪灣蕭蕭白晝閒小樓開八面面面對青
山

○送舅氏吳聖允歸新安

此地一爲別悠悠動我思笑言原有日往返已多
時鼓棹乘風迅開樽傍月遲渭陽空佇立不得共
追隨

○和劉予弱初夏漫咏

翠麥翻風日漸長水邊林下足徜徉豈因客至常
沽酒偶爲郊遊亦裹糧羨爾才多如子建顧予癡
絕似長康今朝漫和陽春曲敢道馳驅翰墨場
閉口人間事不談詩書幾卷極幽探只應身隱山

之北那用名懸斗以南開徑竹間來二仲聽鶯橋
畔有雙柑晚來客去惟高卧看取蟾光照碧潭

○胡原上有震鄰之恐往奔顧山兩月復歸連

床話舊

一從別去恨難禁復喜今朝得共吟閱盡亂離仍
有骨過來貧賤總無心開軒明月杯中照下榻微
風簾外侵莫道避人還避世却教肥遯入深林

○題程豈一別業

茅屋蕭蕭三兩間君今避地得清閒閉門車馬辭

徵逐結伴漁樵共往還事少漫吟詩遣興客來相
勸酒開顏栖遲泌水堪行樂不用餘錢更買山

題桃源圖

青山重疊雲模糊緣溪桃花千萬株桑麻被畦雞
犬靜此中疑是神仙都武陵漁父獨何幸扁舟乃
許窺靈境壺天日月異人寰且莫歸來問鄉井昔
聞張騫入斗牛乘槎直截銀河流辛勤乞得支機
石何似胡麻飯一甌桃源主人避秦客偶來遂與
塵凡隔自言曾作驪山徒亦復長城苦行役阮餘

翻獲全天年祖龍當日空求仙鮑魚腥斷沙丘道
不見徐市歸樓船一從洗耳清溪下世事紛紛同
野馬區區劉項已無聞豈識新洲伐荻者箕山穎
水堪招邀但求吾樂安簞瓢須知揖讓不足汗况
復篡奪偷崇朝五柳先生有餘痛寓言聊比窮途
慟劉君好事思問津毋乃夢中還說夢人間隨地
有桃源閉門寧愁車馬喧古人大隱在城市斯意
難向時流言借君此圖懸我壁卧起觀之三歎息
三山何處五嶽遙俯仰浮生傷偏仄

○來鶴堂賞菊

風風雨雨過重陽尚有黃花傍短牆脉脉餘芬凝
淡月叢叢冷艷倚新霜舉杯縱飲鐘徐動刻燭狂
吟鶴欲翔此夕共拚陶令醉浮雲世事捻相忘

○蠟梅步令儀吳夫子韻

與梅原共譜別自占年光殘葉全辭樹寒葩始弄
香不須腮傅粉只是額塗黃訝道枝如缺偏能耐
雪霜

○春遊

不分東風忽轉南春流處處瀉寒潭柳堤翻翠鶯
吮滑花徑攢香蝶夢酣偶爲呼樽經野店還因訪
道過茅菴清歌日暮能留客痛飲狂吟興正堪

○次韻送胡原上浙遊六首

把酒聽鶯及暮春年年共作送春人今君一渡蘭
溪水冷落吟場又幾旬

風月無煩折券支披襟對飲見芳規新來更得江
山助八詠爭傳絕妙辭

一枝容膝易求安底事空嗟蜀道難莫笑濁醪兼

糲飯杜陵還有腐儒餐

秋霜看欲上須眉襤被蕭蕭信所之香茗數甌書
數卷此中閑味少人知

持竿盡日坐漁磯爲嘆人間事事非從此歸來無
事事白鷗相對共忘機

看君年事倍於儂杖履年來許我從慰別不辭開
昔酒先將大斗祝高松

○次韻壽令儀吳夫子五十

絳帳相隨十載過年光如昨未蹉跎休言杜甫形

偏瘦豈比潘安鬢易皤遊跡未須悲道路生涯且
喜卧煙波聞窗欲寫新詩句凍硯雲生曉自呵
滿耳吳歌倡阿儂層雲却喜盪心曾持觴祗效陶
彭澤沾祿何須邴曼容吟裏看山扶短策閒中招
鶴傍高松振衣不許纖塵染超絕從攀千仞峯

和雨窗看奕

黯淡春光試捲帷不堪微雨濕臙脂鬢絲禪榻無
餘事欹枕閒看自在棋

濛濛濕霧鎖荆扉紅撥爐灰篆影微莫漫當機爭

勝負一枰聊取破愁圍

當場誰肯便低頭決勝全憑在運籌黑白若歸收
拾後問君何處用奇謀

局外須知審局難慙余袖手法春寒千秋得失多
如此誰解楸枰仔細看

茉莉花次顧雪坡韻

的皜當朱夏天工著意裁不滋晨露綻却倚晚涼
開似麝初凝爪如珠乍剖胎莫嗤珍重意遙自瘴
鄉來

初秋夜集次青門韻

雁影欲橫空池蓮已褪紅人情雙白眼心事一焦
桐露冷鐘初徹風清漏未窮高談憑傲世意氣許
誰同

蠟梅次陳子京韻

官樣輕黃色正賒未須獨擅老禪家蜜脾夜影浮
星彩金屑朝姿射日華肯向紅樓爭落粉羞當靈
苑雜凡花江南臘信偏能識一樹凌寒發舊葩

新秋雨過次韻

夜涼溪館自清幽露濕荷裳溽暑收最是秋光看
不盡一天明月曙河流
雨餘風送白雲長坐看山光接水光蛩響一聲秋
思切不知宋玉幾迴腸

詠羽扇次韻

羨此凌霄羽金刀費剪裁招風雙翮健揭月一輪
開謝恨殊難掩班愁詎復來動搖堪却暑冰簟好
相陪

送吳簡臣歸新安

亦不集卷之十一
九
異地相逢喜氣生
臨觴那復動離情
雲連碧樹歸裝遠
潮滿秋江去棹輕
老大君還牽物役
疎慵我久背時名
故山萸菊虛回首
有約凌風汗漫行

○送劉跨千赴金陵幕次韻

滿眼青山客路長
萍踪隨分得閒忙
暮潮挾舵迴荒岸
秋草題詩趁夕陽
對月不堪頻倚檻
臨風猶擬共持觴
若過古步邀吹笛
好共桓伊一據床

○紅梅四首

亭亭仍是歲寒姿
故換新妝淡點脂
多謝東風殊

有意倚簷開遍舊年枝

輕紅淺絳獨先春
折取還堪贈遠人
最是一枝低

亞處黃昏斜壓月痕新

一樹微堆洛浦霞
偏宜酒客與詩家
何人更作梅

花賦玉綴珠離未足誇

疎影清光迥不同
香魂應與醉魂通
倚風若向牆頭見
錯認徐妃半面紅

八月十五夜寓楓江

天上雲初淨
人間月倍明
鐘沈江寺遠
潮上客舟

亦不集卷之三
十一
輕好景間中得愁懷醉後平鄉心旋欲動岸樹有
秋聲

虞山友人過訪楓江寓舍有作見贈即次元
韻

攜手楓江上秋光共眼前殘鐘涼夜月新雁夕陽
天酒熟逢良友詩成感逝川相看復相戀言別覺
淒然

隨令儀吳夫子遊虎丘次韻

歌吹何寥落西風雁到初眼前山轉翠身外事全

疎杖屨曾無定川原只自如躊躇歸路晚紅葉點
煙墟

覲菴先生再訪楓江寓齋有作見贈次韻

仍爲百里客復喜話襟期念別無多日相思已有
時醉從杯潦倒書就墨淋漓今夕重攜手情深感
贈詩

○晚春集季文起齋中次韻

及時已是晚春遊野鳥啼花徑轉幽飲劇不嫌歸
路遠暮雲回首重遲留

草長荒途碍過鞦獨開三徑待羊求此中已覺違
塵世况有青山看不休

○新葺書齋次韻

新齋頗幽寂聊以寄迂疎簷矮堪巢燕庭寬好曝
書苔紋朝雨後花韻午晴餘自得閒居趣華堂較
未如

○正月十七日招友人集來鶴堂限韻

熏爐酒醖簇春燈幽室偏宜集勝朋虞褚書驚龍
天矯班揚詞喜鳳騫騰心期共付三搥鼓筋力寧

資七尺藤判醉莫嫌通夜飲韶華瞥眼恐難憑

○楓江旅次送吳儀吉歸新安

吳市同遊已十年一番去住意淒然鄉心脉脉隨
帆轉客思摇摇似旆懸舟發楓江疎柳外人歸黃
海亂雲邊看來未是蓬蒿客豈便容君息萬緣儀吉

家有別墅額曰萬緣俱息

○暮春至賁湖寓從兄汝藩齋中有感

廿載違斯地春風倚棹過事悲今昔異人覺是非
多堤柳勻如染林鶯巧似歌淹留仍未已且放醉

顏酡

○寓郁子彪留耕樓間望

地僻村深少送迎此中煙景有誰爭一溪漁唱臨
風釣兩岸農歌帶雨耕遠近山嵐延秀色去來雲
影淡閒情莫言虞嶺無多路猶隔迢迢百里程

○庚申花朝同陸覲菴先生錢梅仙榮玉裁集

三省軒觀梅限韻

一樹開何早春先小隱家只須頻貫酒不用更尋
花老幹饒霜色幽姿淡月華莫辭通夕飲看到影

橫斜

○同覲菴先生過湛弘禪齋適薔薇盛開留飲

次韻

鈎衣刺眼晚風前底事精藍錦忽纏艷色故窺僧
定候濃熏徐度雨餘天開窗却喜呼尊對傍架還
容席地眠悟得浮生成半偈紛華滿眼覺翛然

○次姚玉衡見詒原韻

羨君倚馬才難敵媿我雕蟲技正疎移柱愛彈中
散曲臨池時仿右軍書乘風破浪艱難裏把酒論

文慷慨餘身在塵囂心不競早從禪定證如如
○送程聖符之皖城

千里鄉關悵望中又攜書劍向秋風人歌折柳催
征棹鳥勸提壺緩去篷漂泊不嫌身似梗笑談偏
喜氣如虹嗟余索莫長留此擬辦輿糧送五窮
行李匆匆信所之虞山郭外送君時江邊惜別三
升酒花下留行一局碁瓜步波濤聲浩蕩秣陵煙
樹影參差風光處處牽遊思莫忘三年是晤期

拜子游墓

夙昔仰先賢登臨蒼莽前荒墳盤古木幽隧枕流
泉文學千秋在絃歌四海傳愛人從學道佩服已
拳拳

○楓江早發

晨鐘聞古寺撥棹向中流月落千山曉風鳴萬樹
秋才名慚倚馬心事欲盟鷗吳越頻來去空憐汗
漫遊

○楊村晚泊

落日川原暗停舟古岸坳野蕞青草製墟飯綠荷

色脫網魚潛水歸林鳥覓巢欲尋沽酒處青旆出
林梢

○楓江寓舍留別吳子育

天涯同作客歲晏一逢君樹曉烏啼月江寒雁度
雲壯懷徒說劍樂事且論文攜手還分手當杯日
又曛

○程惟達從皖城來虞山話舊

握手都非舊日容寒宵促坐潑醅濃身隨上下江
千里家隔高低嶺萬重意氣消磨悲老大琴書狼

藉恠疎慵年來未出昏衢裏更有何人駕燭龍

○再赴嘉禾作

行李蕭蕭上客舟鴛鴦湖畔有層樓雲山曉望迷
鄉思鼓角宵聞動旅愁運去空餘書劍恨窮來休
問稻粱謀此行投足知何所莫漫逢人說壯遊

○送汪簡菴之任新都

新除墨綬離京師玉潔冰清天下知日落江波通
錦水雲開蜀道見峩嶠漢家快覩稱三異宋代重
聞咏十奇共道君才非百里待看丹鳳下彤墀

重過姚玉衡齋中留宿

卜築近廛市孤高不受塵清言仍歷落俠骨更嶙峋把盞常連夜看花愛向晨感君重設醴不厭去來頻

○贈姚白菴

相見雖今日相思已有年德矜溫似玉道愛直如弦篇什追開府溪山逼巨然風塵久已息不用卧林泉

○途次有感

何處維舟好千山又落暉漁歌鼓棹去樵唱負薪歸遠寺鐘聲斷孤村樹影微撫膺思往事盡覺到今非

○癸亥人日集庭仙齋懷伯兄以韜五弟以南次觀菴先生韻

泥滑全憑竹杖扶靈辰小酌抵良圖春鉤緩送酒腸澀凍筆頻呵詩思枯也合署名爲浪士不妨著論似潛夫緣知兩地裁金勝千里遙懷劇飲徒

○次和在之陳先生癸亥落花詩

按原序云幹窮于癸枝窮

于亥癸亥三春不日不月桃李蹊沈登
臨路斷潺潺溝水時見落花故有是作

粧飾枯林賴百花花神何不惜芳華却憑風雨侵
欺殺祇道君王判斷差夢裏祇宜爲蛺蝶眼前唯
恐似蝦蟆鹽鐵論甕牖蒿蘆謾言芍藥天留得因
在長安富貴家

樹樹摧殘似早梅臨軒羯鼓枉相催波漂紅紫兼
流電水落溪塘助殷雷雌霓乍將靈雨截雄鳩又
喚水雲來不知天有何愁悶也似春襟鬱未開
裏足埋頭今更宜謾思前度看花期恐爲魚鱉沈

諸水擬向鷓鴣借一枝有淚哭春朝起早無書乞
米午炊遲灌園未辦扶陽手寄語東山莫賭碁
花塢淒涼麥隴荒黑雲猶自蔽天光名園古有文
章據春樹今無錦繡粧鷹訝亂紅埋兔窟鶴驚溪
漲失魚梁可憐雨不知時至杜詩好雨勝是三秋
殺草霜

桃腮杏臉淚交流如此泥塗豈可遊且與故人論
比興更教小子讀春秋忍飢錦雉因憐尾尋艷黃
蜂不轉頭梓澤蘭亭傷異代于今天幕足淹留

電笑霆嗔天未醒人憂似梗逐浮萍春光一雨洗
竟盡世味千波濯亦醒杜宇枝頭懸蝮蝮百勞溪
上趁蜻蜓用杜詩麥如腐草猶徵稅除是多收幾斛
螢

樹梢偶爾見斜曛况是花飛紛復紜只恐百憂成
磊塊何當一笑散重雲漏天未補因頑石大厦將
頽為朽焚春景如秋朝似暮陰陽疑是不曾分
築堰開渠每荷蕞可憐錦段委狂波芳蘭却使根
先爛蔓草翻留劫外過燕得香泥穿北戶梁簡文燕詩銜

花落北戶蟻加封土到南柯傷心記得前年事轉壑飢
民似此多未申兩年旱潦相繼

和孫麗明竹深處十二詠

風前

挺拔千竿竹紛披一逕風重陰排靉靄碎影亂玲瓏
忽忽飄清爽離離掃碧空更聽成韻處何異截
為筩

月下

碧玉亭亭立金波灑灑浮虛籠三徑雪閒弄一庭

秋乘隙光微漏含滋翠欲流有枝堪寄托飛鵲漫
須愁

雨餘

鮮潤應無比尤憐一雨餘亂聲停浙浙清響滴徐
徐宿霧將披豁纖塵盡滌除未乾留幾點隱約淚
痕疎

雪霽

曉起寒差減林開眼欲迷晴梢珠貫密凍葉玉鋪
齊昨聽聲頻折今看影尚低梁園如賦就應向逐

竿題

花欄

最愛新分竹相依舊種花只須疎掩映不遣密週
遮綠覆溟濛霧紅藏爛熳霞繁華容易散慎勿弄
歌斜

煙隴

不雨連村暗非雲匝隴寒釀成濃霧靄遮却萬琅
玕黯澹蟬聲咽迷離鶴夢殘只須開爽後不減舊
平安

新晴

林外初收雨梢頭漸放晴
篩金微有影夏玉寂無
聲逾覺丰姿秀偏形骨相清
何當閒夢斷餘爽薦
桃笙

宿露

秋晚筠猶綠宵來露更滋
晨光初昱燭秀色轉歲
蕤綴玉枝枝重懸珠葉葉垂子猷如欲看須趁未
晞時

池上

彷彿梁園裏檀欒夾一池
波翻金瑣碎影蘸碧琉璃
沃得滋根地樊編匝岸籬
蕭蕭誰作伴蒲柳又
秋時

巖阿

憐得孤生竹相依萬仞岡
澗泉添逸韻柏麝和清
香自分終丘壑寧辭受雪霜
地荒難結實何以飼
鸞凰

書窓

宛似楊惺室窓虛翠滿櫺
終年君待鳳幾度我囊

亦有集卷之七
三
螢日影晴飛白藜光夜汗青不須披卷坐心境已
空靈

吟社

嵇阮遠相尋相期到竹林不妨留竟日漫欲倚高
吟龍吹添清思鸞歌荅雅音自今深結納莫負歲
寒心

亦有集卷之上

